



VINNUEFTIRLIT RÍKISINS

Ákvörðun nr. 8/2018
Reykjavík, 17. maí 2018

Álagning dagsekta á Uppfyllingu ehf. vegna vanrækslu á að fara eftir fyrirmælum Vinnu- og atvinnuleysisráðs ríkisins

I. Málavextir

Uppfylling ehf., kt. 671272-1539, var í vinnuvélaskrá Vinnu- og atvinnuleysisráðs ríkisins skráður eigandi 17 vinnuvéla, nánar tiltekið vinnuvélanna EB0577, FH0447, GB0565, IM0967, FH0473, VH0700, JF0304, JL3144, EB0452, EH1234, GB0291, EB0418, EB0629, EA0248, HV0103, EB1682 og EB1763. Þrátt fyrir ítrekaðar tilraunir starfsmanna Vinnu- og atvinnuleysisráðsins þá neitaði eigandi vélanna að heimila þeim aðgang að vélunum og aðstoð við skoðun þeirra, t.d. gangsetningu og prófun. Umræddar vélar voru skoðunarskyldar skv. 9. gr. reglna nr. 388/1989 um skráningu og skoðun farandvinnuvéla og vinnuvéla og var skoðun allra vélanna útrunnin.

Af framangreindum ástæðum var Uppfylling ehf. veitt eftirfarandi fyrirmæli í eftirlitsskýrslu B 107434:

- Tryggja skal að vinnuvélarnar EB0577, FH0447, GB0565, IM0967, FH0473, VH0700, JF0304, JL3144, EB0452, EH1234, GB0291, EB0418, EB0629, EA0248, HV0103, EB1682 og EB1763 verði skoðaðar af starfsmönnum Vinnu- og atvinnuleysisráðsins eða láti afskrá þær að öðrum kosti.

Voru fyrirmælin gefin á grundvelli 9. gr. reglna nr. 388/1989 um skráningu og skoðun farandvinnuvéla og vinnuvéla og 46. gr. 49. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum.

Þann 26. til 29. janúar 2018 skoðuðu starfsmenn Vinnu- og atvinnuleysisráðs ríkisins vinnuvélarnar EB0577, FH0447, IM0967, FH0473, EB0452, GB0291, EB0418, EB0629, EA0248, HV0103, EB1682 og EB1763. Átti þá eftir að skoða eða afskrá 5 vinnuvélar. Fyrirmælin voru því ítrekuð með bréfi

sem Vinnueftirlit ríkisins sendi Uppfyllingu ehf., dags. 31. janúar 2018. Þann 1. febrúar 2018 skoðuðu starfsmenn Vinnueftirlitsins vinnuvélina IM0967 og þann 12. febrúar 2018 var vinnuvélin JF0304 skoðuð. Þar sem þá átti eftir að gera grein fyrir 3 vinnuvélum var fyrirtækinu send ný ítrekun, dags. 15. febrúar 2018. Þrátt fyrir þessar ítrekanir þá var ekki farið eftir þessum fyrirmælum Vinnueftirlits ríkisins hvað varðaði vinnuvélarnar JL3144, VH0700 og GB0565.

Með bréfi, dags. 18. apríl 2018, var athygli vakin á rétti aðila skv. 13. gr. stjórnisýslulaga nr. 37/1993 að tjá sig um efni máls áður en ákvörðun yrði tekin í því. Kom fram í bréfinu að Vinnueftirlit ríkisins væri að íhuga að leggja dagsektir á Uppfyllingu ehf. þar sem það hafði ekki farið að ofangreindum fyrirmælum stofnunarinnar. Uppfylling ehf. var veitt 14 daga frestur til að koma að andmælum áður en Vinnueftirlit ríkisins tæki ákvörðun um hvort leggja skyldi á fyrirtækið dagsektir, sbr. heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum. Með tölvubréfi, dags. 20. apríl 2018, barst svar frá fyrirtækinu þar sem fram kom að ein framangreind vinnuvél hefðu verið seldar erlendis og hinar tvær væri ekki í notkun og að til stæða að afskrá þær. Með tölvubréfi dags. 23. apríl 2018, benti Vinnueftirlit ríkisins fyrirtækinu á að það þyrfti að láta Vinnueftirlitið skoða þær vélar sem eftir voru eða afskrá þær af vinnuvélaskrá, ef slíkt yrði ekki gert væri litið svo á að ekki hefði verið farið eftir fyrirmælum stofnunarinnar og til álagningar dagsekta gæti komið án frekari fyrirvara. Með tölvubréfi, dags. 23. apríl sl., svaraði fyrirtækið með þeim hætti að „á næstu dögum verði send inn númer af tækjunum VH0700 og JL3144“. Þeim tölvupósti svaraði Vinnueftirlitið með tölvubréfi, dags. 23. apríl sl. þar sem fyrirtækinu var leiðbeint um hvernig afskrá ætti vélar af vinnuvélaskrá. Ekkert frekar heyrðist frá Uppfyllingu ehf.

II. Niðurstaða

Samkvæmt 1. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum er það tilgangur laganna að tryggja öruggt og heilsusamlegt starfsumhverfi. Samkvæmt 75. gr. laga nr. 46/1980 er það hlutverk Vinnueftirlits ríkisins að hafa eftirlit með lögnum. Í lögum um aðbúnað, hollustuhætti og öryggi á vinnustöðum eru mörg almenn efnisákvæði er kveða á um hvernig vinnuumhverfi starfsmanna skuli háttáð og í reglum og reglugerðum sem settar hafa verið á grundvelli þeirra eru ákvæði laganna nánar útfærð.

Samkvæmt 13. gr. laga nr. 46/1980 er það skylda atvinnurekanda að tryggja að gætt sé fyllsta öryggis og góðs aðbúnaðar og hollustuhátta á vinnustað. Skv. 37. gr., 42. gr. og 46. gr. laga nr. 46/1980 skal fylgja fyrirmælum Vinnueftirlits ríkisins að því er varðar aðbúnað, hollustuhætti og öryggi á vinnustöðum. Ákvæði 6. mgr. 82. gr. laga nr. 46/1980 kveður á um það að ef Vinnueftirlit ríkisins beinir skriflegum fyrirmælum til atvinnurekanda um úrbætur á vinnustað ber viðkomandi atvinnurekanda eða fulltrúa hans að tilkynna stofnuninni formlega, svo sem bréflaga eða með rafrænum hætti, þegar umræddum úrbótum er lokið á vinnustaðnum. Þar sem Uppfylling ehf. hefur ekki farið að framangreindum fyrirmælum Vinnueftirlits ríkisins þrátt fyrir að fyrirmælin hafi verið ítrekuð þá hefur stofnunin tekið þá ákvörðun að leggja á Uppfyllingu ehf. dagsektir, sbr. heimild í 87. gr. laga nr. 46/1980, þangað til fyrirtækið uppfyllir lagaskyldur sínar, en sú grein kveður á um það, að ef ákvæði laga nr. 46/1980 eða reglna sem settar eru með stoð í þeim eru

brotin og ekki er farið eftir ákvörðun Vinnueftirlits ríkisins á grundvelli þeirra þá getur stofnunin ákveðið að sá eða þeir sem ákvörðun beinist að greiði dagsektir þar til farið verður að henni.

III. Ákvörðunarorð

„Uppfylling ehf., kt. 671272-1539, hefur brotið gegn 9. gr. reglna nr. 388/1989 um skráningu og skoðun farandvinnuvéla og vinnuvéla og 46. gr. og 49. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum.

Af þeim sökum og með heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum, leggur Vinnueftirlit ríkisins dagsektir á Uppfyllingu ehf. Skal fyrirtækið greiða kr. 15.000 á dag frá og með næsta degi eftir að fyrirtækinu var tilkynnt sannanlega um þennan úrskurð og þar til það hefur tilkynnt um úrbætur til Vinnueftirlits ríkisins í samræmi við ákvörðun Vinnueftirlits ríkisins frá 15. janúar 2018.”

Vinnueftirlit ríkisins